

«Per entant anc nagin program da spargn»

CUN BARBARA JANOM STEINER
HA DISCURRÌ FLURIN ANDRY / ANR

■ Era sch' il chantun Grischun budgetescha per l'onn 2016 in deficit da 50,8 milliuns francs è la basa finanziaria dal Grischun anc solida. La cussegliera governativa Barbara Janom Steiner avertescha però ch' ils proxims onns ristgian da vegnir pli difficils.

Ils ultims onns ha il chantun Grischun adina prognostigà deficits e cuntanschi cifras nairas. Vegn quai ad esser il cas era per l'onn 2016?

Barbara Janom Steiner: Na, per il mument betg. Igl è realitad che nus survegnin damain dad ina vart ord l'egualisaziun da finanzas naziunala. Alura pajain nus a partir da Bumaun 2016 dapli a l'egualisaziun da finanzas en il chantun. Nus vesain plaun plaunet effects dal franc ferm en il turissem ed era tscherts effects da l'iniziativa da las abitaziuns secundaras. L'onn 2016 vegn ad esser probablamain anc cumparegliabel cun quest onn. Ma segiramain a partir dal 2017/18 è la situaziun finanziaria anc pli difficila. Qua avain nus er effects da livel naziunal anc betg enconuschents: Actualmain na savain nus betg tge che capita cun la Refurma da las impostas per las interpresas III. Quai vegn ad avair probablamain gronds effects sin l'egualisaziun da finanzas. I n'è era betg da far quint che nus survegnian durant l'onn 2016 ina contribuziun da la Banca naziunala. Quai n'avain nus era betg budgetà.

Ha il deficit prognostigà consequenzas per las investiziuns per l'onn 2016?

Na, las investiziuns vegnan ad esser anc adina fitg autas. Igl è era la politica che



La ministra da finanzas Barbara Janom Steiner ha preschentà il budget chantunal 2016.

FOTO F. ANDRY

nus vulain mantegnair e tegnair autas las investiziuns. En temps difficils èsi impurtant ch' il chantun restia in partinari fidaivel. Nus essan capabels d'investir, nus avain previs grondas investiziuns, surtut er investiziuns che vegnan finanziadas ordvart da las limitas. Exempels en qua il stabiliment Sinergia e la nova praschun. Las investiziuns restan autas.

Ston projects vegnir suspendids?

Na, per il mument nagins. Nus vesain però che nus avain durant ils onns 2017 e 2018 fitg grondas investiziuns apunta cun quests projects. Quai vegn a chaschunar probablamain ina tscherta stretgira finanziaria.

Prevesa il chantun da decider mesiras da spargn?

En emprima lingia èsi da cuntinuar a restar fitg disciplinà cun las expensas.

Jau sper er ch' il cussegl grond sa tegnia londervi. Per il mument na prevesain nus anc betg in program da respargn. Però, i dependa uss sco menziunà da tscherts effects e co ch' els sa sviluppan. Quai è uss da spetgar ed observar quel svilup. Tut tenor èsi da reagir, forsa era cun mesiras da spargn. Però uss anc betg.

Tge consequenzas ha la crisa da l'euro per las finanzas grischunas? Co guardi

ora cun il turissem grischun ch'è sut squitsch causa l'euro flaivel, sto il chantun far quint cun damain entradas da taglia?

La situaziun è segiramain fitg difficila per il turissem ch'è la branscha la pli impurtanta en Grischun. Ins vesa gia uss che las cifras da pernottaziuns sa diminuischan. Quai ha natiralmain alura er effects sin las impostas. Però quai vegn alura pir pli tard. Igl è dentant da far quint che quai vegnia ad avair in effect sin las finanzas chantunalas.

Il Grischun posseda 2,7 milliardas francs agen chapital, da quel èn disponibils 400 fin 500 milliuns francs. Tge prevesa il chantun da far cun questas finanzas?

Dad ina vart avain nus uss in nov sistem d'egualisaziun da finanzas chantunal. Per quel sistem vegnin nus a duvrar in zic dapliras finanzas. Alura avain nus gist decis 80 milliuns francs per sustegnair l'economia, per finanziar projects ch'èn relevants per il sistem. Nus avain da far quint che nus survegnin damain or da l'egualisaziun da finanzas naziunala ed avain da realisar anc gronds projects. Ed uschè ditg che nus avain natiralmain er anc deficits vegnan quels finanziads or da l'agen chapital. La realisaziun da gronds projects è uss pussaivla, igl è però da savair che l'agen chapital nun è illimità. Nus na pudain betg avair onns a la lunga da quests deficits. Quai consumass l'agen chapital, las reserves. Impurtant èsi da tegnair en egl quest svilup. Emprima prioritad ha la disciplina cun decider expensas, alura èsi a lunga vista d'examinar er eventualas mesiras da spargn. La finamira è da betg vegnir puspè en deficits structurals ed era da betg far debits. Per il mument nun avain nus nagins debits.